

Zeyixr Sul

Quex Dae Nei Bbeix Gger Zaxr Dae Ddar Mel Hormo Per

- 1** ¹ Yirsaexllixl su ddei zzirmar, Daxlweixl ddei ssor Sorloxrmexr ddei Zeyixr mel:
- ² Ca leil olnolddu mel nei mul gger dae mel saexl lol,
yarzi saexl sol mel saexl lol,
- ³ Ca leil quex dae mel noni lol,
camu-wormu a seirseir bei,
bbaehhexhhexmo bei,
nixmox seir;
- ⁴ Ca medeil leil jilixr lol,
leixlsu leil sul saexl lol,
zuxryix zza lol,
- ⁵ Olnol ddu su ca mel leil bbejjiur a sul saexl dax lol,
jilixr su mel leil olnol ddu mel xiar teixl lei xie lol,
- ⁶ Ca leil Zeyixr nei bir dae a bbeix dae ddar mel noni wo xie lol,
olnol ddu su ca ddei ddar nei zzirddar mel saexl lol.

Leixl Su Mel Leil Quex

- ⁷ Yihexrhuaxr leil gexr nei i du a mel sul saexl du lei beil,
medeil waxrgul ca mel mul gger dae mel leil nei olnol ddu mel
leil i zeil.
- ⁸ Ngo ddei ssor, niabor mulgger dae mel leil noni nia,
niama ddei leiddur mel dax nr mae bei nr ddo,
- ⁹ eilmemel ni oldde leil ddexr labox ddei bei nia,
leibbei leil (gaxl labox) sae zex bei nia.

- ¹⁰ Ngo ddei ssor, ca mel ni leil nol lei arddeirnga a,
ni mae ssi nr ddo.
- ¹¹ Yaa bbeix: “Ni ngua dax mae lei ddo a!
ngua pahher dae a ca leil sirnilni ddux lol,
neix dae a, zuixl nr zza ca ddei leil ke.
- ¹² Ngua mel yiji sael a nga, semama yaa leil ixlji;
yaa mel bbeddur gga ze ci ca sael a nga, ngua semama yaa leil
ixji a.
- ¹³ Ngua arsae bei lei cirza-hanga zzaegu naxrcixlcixl mel li wo
ddo,
su si lei mel xi gga ji bbi.
- ¹⁴ Ni ngua dax cirgo a bei ddo a;
niul zzirbae lixlba cir ddei a sser,” eine bbeix arddeirnga a lei
(noni nr ddo).
- ¹⁵ Ngo ddei ssor, (ni) yaa dax jjiumo cirzex a ssi nr ddo,
ni ddei qiuhher zze leil bbiur gex dae a, yaa ddei jjiumo zeix leil
ssi nr ddo.
- ¹⁶ Yaa mel qiuhher zze beix dae a gexrddoddo mel bei,
ggerggelgger ca leil sirnilni ddux lol,
- ¹⁷ bbiu dae ngax sael a nga,
bel ddei yar meixsaer qir leil xiagl dae mia a halae pa nr hher.
- ¹⁸ Ca eilmel pahher dae a mel, armael leil sirnilni ddux lol,
neix dae a mel armael olga leil ke.
- ¹⁹ Nrseir bei a li wo zzirbae mel leil tuxr meixr su ca mel dder
eine nga a.
Nrseir bei a li wo zzirbae mel yaa ddei olga ddei li si nia.

Olnol Ddu Ddei Ca Leil Ae

- ²⁰ Olnol ddu ddei zzijiul gga ae dae,
kuax ggie worcixl-worni ae,
- ²¹ vxnix ggie zzi oldde dax ae dae,
zzi gielmi nei zzi gga qiurte ae teixl lei a bbeix:
- ²² “Nia ca medeil mel medeil mel nolnger,

- ca leil bbeixvuxryixr su mel bbeix vuxryixr meixr,
 azo lei nr saexl su mel sul saexl mel leil vuxryixr a arddolcar a
 ci niazzir dae neil?
- ²³ Nia mel ngo bota dae a za xixl lei nia,
 ngo dder ngo ddei xiu ddei nia dax hher ji dae lol,
 ngo ddei ddar mel nia leil mul gger.
- ²⁴ Ngo ae dae a, nia noni su nr zza;
 ngo leixrhher zze cei teixl a i meixl gger su nr zza.
- ²⁵ Nia halae ngo quex dae hazza leil i zeil,
 ngo bota dae mel leil no-nr-ni.
- ²⁶ Yel nia goxrsol-goxrnaxr pex dae car ngo dder (zex) vae;
 gexrddoddo mel nia leil ddeix cir ni ngo vae ssi.
- ²⁷ Gexrddoddo mel nia leil ddeix a, mersi vaervaer sael a nga,
 Goxrsol-goxrnaxr mel mersi sixl sael a lei,
 goxrsol mel nei nrseir mel nia ggecir leil ddeix.
- ²⁸ Halcar a nia ngo leil ae dae a qiuxr nia,
 nael ngo zzael ddar-nr-koxl,
 nia zixlkur-zixllixl ngo leil zo nia, nael zo wo nr ddo.
- ²⁹ Nia mel sul saexl mel leil vuxryixr,
 Yihexrhuaxr leil i du nr meixr,
- ³⁰ ngo quex dae mel leil no-nr-ni,
 ngo bota dae hazza leil i zeil,
- ³¹ yel nia armael niar teixl lei saer mel zzor nia,
 nia armael nrseir xiar dae mel,
 nia leil bboxlbbbox goxr lol nia.
- ³² Ca oldeil mel ddar-nr-no a, armael leil seixl zil gger nia;
 ca medeil mel goxr seir a armael leil ke zil gger nia.
- ³³ Nael ngo leil noni su mel zzasoso a goxr nia,
 sosarsar a goxr wo ddo,
 goxrsol-goxrnaxr mel leil nr gexr.”

Olnol Ddu Ddei Ca Leil Arbosobo Leil Saexl Lol

- ² ¹ Ngo ddei ssor, ni ngo ddei ddar no,
 ngo miardal dae ddei leil holcir,
² seirseir a olnolddu mel noni,
 seirseir a jilixr lol qiuxr,
³ ae dae a azo lei saexl ddei leil qiuxr,
 worcixl-worni jilixr ddei leil ae,
⁴ yar leil zo a piu zo sael a zo,
 yar leil pox a zzaegu naxrcixlcixl mel leil pox sael a pox
 arddeirnga a,
⁵ ni dder saexl, Yihexrhuaxr leil i du a mel,
 Arbosobo leil saexl var.
⁶ Yihexrhuaxr mel ca leil olnol ddu lol,
 sul saexl nei jilixr maelmaerjia yar meir gga ddux lei.
⁷ Yar nixmox seir su ca mel leil yarzisael olnol ddu lol,
 bei hoxr gaxzi su ca mel ddei pahher ggie bei.
⁸ Yar seirseir mo jjiumo zex leil su dae,
 yar dax bei mae gaxzi su ca mel ddei jjiumo zex leil guaxr dae.
⁹ Eine nga a, ni dder seirseir,
 bbaehhex, hoxrhoxr nei ddar seir hazza leil saexl.
¹⁰ Olnol ddu ddei ni nixmox gga ddir nia.
 sul saexl ddei ni ddei xiu ddei leil ggese lol.
¹¹ Zuxryix ddei ni zaza-lili hher dae,
 jilixr ddei ni leil guaxr dae.
¹² Olnol ddu ddei ni leil gexrddoddomo ddar mel dax jiuxl teixl lei,
 nrbba-nrbba ddar biar su ca mel dax jiuxl teixl lei.
¹³ Ca hal mel mel jjiumo hoxrhoxr zex leil nr ssi,
 jjiumo neixmarmar zex leil ssi,
¹⁴ Yaa gexrddoddo mo bei meixr/ggese.
 Gexrddoddo mo loxr yaa nolnger.
¹⁵ Yaa ddei jjiumo zex ku ho a;
 yaa cibbi ddei jjiumo hoxrhoxr zex leil nr zeil.
¹⁶ Olnolddu ddei ni leil kerjiaer su ssormaer mel dax jiuxl teixl lei,

meir yarzi bbeix var ggecir vur lel su ssormaer mel dax jiuxl teixl lei.

¹⁷ Yar mel yar leixl tor seir zo capor ddei leil nr li, Arbosobo dax bbeixhargoxr mel leil hol-nr-cir.

¹⁸ Yar ddei ake ddei xiaxr a; yar ddei jiumo zex yiji gga ssi mal.

¹⁹ Ha yar dax halmaex ssi su mel dder za xixl lei nr cexr, olga zza jjiumo zex leil zo wo nr ddo.

²⁰ Olnolddu ddei ni leil ca seir ddei jjiumo leil ssi lol, nixmox seir su ca ddei jjiumo leil su dae lol.

²¹ Bei seirgaxzi su ca mel middurbbor goxr dae nia. Botaddu nr zza ca mel middurbbor zza dae nia.

²² Nixmox neix su mel leil larnei bei zil gger, ca fur su mel leil larnei zix teixl lei.

Leixlsu Mel Leil Bbeix Gger

3 ¹ Ngo ddei ssor, ngo ddei lixfaxr mel leil hol-nr-cir bei nr ddo; ni nixmox ddei ngo miardal dae mel dax seilseir a bei mae dae nia;

² eil ddei mel ni leil olga si lol, zzasoso a nixixl goxr lol.

³ Ca leil perniar nei ddarzziddo mel ni dax bbe kae lol nr ddo, ni leibbei leil ddexr dae nia, ni nixmox zzar ji dae nia.

⁴ Eine nga a, Arbosobo nei ca mel lei ni leil ggese.

⁵ Ni nixmox cirtaex-larbba Yihexrhuaxr leil koxl nia, ni jilixr dae mel leil koxl nr ddo.

⁶ ha azo bei lei Yihexrhuaxr leil zo nia, yar dder ni ddei jjiumo zex leil hier.

⁷ Armael olnolddu zzir nr ddo, Yihexrhuaxr leil i du nia, yarzi gexrddo mel dax naer nr ddo.

⁸ Einenga a ni ddei ggecir leil ggu kor gger cexr, ni ddei hherggar mel leil vicircir a nga lol.

- ⁹ Ni zzirbae, zzaegu nei mi gga mi beil hazza sser a,
Yihexrhuaxr leil middux lol nia.
- ¹⁰ Einenga a ni loxlmoxr jiggi xi gga dder bbilbbi zzeilil-zzeilor
zza;
Ni puxrto zzibbaer nixl ggie lei zzibbaer sixll mil teixl lei.
- ¹¹ Ngo ddei ssor, ni Yihexrhuaxr guaxr dae mel leil i zeil nr ddo,
yar bota dae mel leil vuxryixr nr ddo;
- ¹² Yihexrhuaxr perniar dae mel yar dder bota,
Arbbor yar ggese dae ssor ddei leil bota sael a nga.
- ¹³ Olnol ddu, jilixr ca ddei Arbosobo yar leil seir lol.
- ¹⁴ Olddu ddu a mel bir piu li wo leil seir leixl,
seir ggie bbaer ddei bir sae lillil a li wo leil lei miur.
- ¹⁵ Bir helvirsar naxrcixlcixl mel leil naxrcixl leixl,
ni nolnger dae hazza lei yar zzi nr zza.
- ¹⁶ (Olnol ddu ddei) vaexl piar a gga nael olga si,
yo piar a gga nael be.
- ¹⁷ Olnol ddu ddei ni leil ggesese a nixixl goxr lol,
ni leil hier dae a zzasoso jiumo zex leil ssi.
- ¹⁸ Jilixr su ddei Arbosobo yar leil seir lol,
olnolddu ddei yar leil olga zza lol.
- ¹⁹ Yihexrhuaxr olnol dduddu mel sser a muddurbbor coxl,
jilixrlir mel sser a merlabbor ddei zza dae lol.
- ²⁰ Yar saexl dae mel lazzarmo leil ggerggelgger pe dae lol,
yar zico gga zil ddar zeil lei lol.
- ²¹ Ngo ddei ssor ni olnol ddu mel dax nei ni saexl dae mel dax
seilseir a mae dae nia,
eilmel lei ni meixddur zze dax bbe kae lol nr ddo.
- ²² Einenga a yar dder ni ddei olga bei,
ni leibbei leil ddexr ddu zaelzae ddei bei.
- ²³ Eine nga a, ni cibbi ddei barverver mo ssi cexr, toxlsar nr var;
- ²⁴ ni yixr zeil a lei nr gexr,
yixr dae a lei yixrmeixl jjiu seir.
- ²⁵ Neixleixr sael pex dae goxrsol-goxrnaxr mel leil gexr nr ssa,
nixmox neix su mel leil bei koxl xixl ggie mia a gexr-nr-ssar.

- 26 Yihexrhuaxr mel ni ddei koxl ggie;
 yar ni ddei qihher zze leil guaxr dae a bel gga nr ddir lol.
- 27 Ni leixrhher gga seirseir bei bbesur zza arddeirnga a laexl pixl
 nr ddo,
 beijjiu mibbe ca ddei leil bei gger nia.
- 28 Ni eilcar a dder beijjiu ddu zza dae a mel,
 arggerni lei a, ngo arsae bei lei ni leil gger eine bbeix nr ddo.
- 29 Ni dax goxrnaer dae ca mel ni dax naelnaer a goxr dae,
 ni yaa leil ke nr ddo.
- 30 Ca mel zeixleixr ni leil ke-nr-seix mel,
 ni nrbba-nrbba yar dax zex nr ddo.
- 31 Gexrddoddo mo bei su mel leil nixnox nr ddo,
 yaa ddei jjiumo zeix leil tiur nr ddo.
- 32 Yihexrhuaxr mel nr seir bei su mel leil vuxryixr,
 nixmox seir su mel dax naer.
- 33 Yihexrhuaxr nixmox neix su ca mel ddei ake hhexr leil nr seir
 lol,
 nixmox seir su ca mel ddei ake hhexr leil seir lol.
- 34 Yar ca leil vaessi meixr su mel leil vaessi,
 nr col su mel leil seirseir meixl gger.
- 35 Olnol ddu su mel middux nia,
 medeil su mel quexrlixl vaer dax a lei yaa ddei seixldaddu loxr.

Olnoddu A Seirggie Bbaer Zza

- 4** ¹ Leixlsu mel, nia arbbor mulgger dae mel leil noni nia,
 nia nixmox zzar noni dil a dder saexl var.
- ² Ngo nia leil mulgger dae mel seir,
 yel nia ngo mulgger dae mel leil no-nr-ni bei nr ddo.
- ³ Ngo aniuxlsxor tor mel ngabbor ngama perniar dae ssorzil ddei
 nga a.
- ⁴ Arbbor ngo leil mul gger a bbeix: “Ngo ddei ddar mel leil velper
 a holcir dae,
 ngo miardal dae mel dax bei mae dae a, ni dder gol dae cexr.

- ⁵ Olnolddu dax lol nei cirza-hanga saexl dax lol nia;
ngo miardal dae mel leil hol-nr-cir bbeixsael bei nr mae bei nr ddo.
- ⁶ Olnolddu ddei leil nr li bei nr ddo, yar dder ni leil su dae,
ni yar leil nolnger a yar dder ni leil guaxr dae.
- ⁷ Olnolddu ddei mel zoxlyoxl zzir ddei nga a;
ni ddei hazza sser a cirza-hanga saexl dax lol nia.
- ⁸ Olnolddu ddei leil nolnger a, yar dder ni leil cirza-hanga bei cexr lol,
olnolddu ddei leil seilseir a sser a yar dder ni leil middux lol.
- ⁹ Yar oldde leil ddexr labox ddei ni oldde leil ddexr gex gger,
oldde leil ddexr labox yarzi middux hal ddei ni leil gger.
- ¹⁰ Ngo ddei ssor, ni ngo ddei ddar no a, ni dder olga si var.
- ¹¹ Ngo ni leil olnolddu jjiumo zex leil ssi nia mulgger ho a;
ni leil hier dae a jjiumo hoxrhoxr zex leil ssi dae ho a.
- ¹² Ni ssi dae a ni leil bbiurgex dae nr var,
ni beix dae a dezei nr var.
- ¹³ Ni seilseir a ni zzawo mel leil holcir dae nia,
ni zzawo mel hherdder ni ddei olga sael a nga.
- ¹⁴ Nixmox neix su ca mel ssi dae jjiumo zex leil ssi nr ddo,
ca nr seir mel ssi dae jjiumo zeix leil ssi nr ddo.
- ¹⁵ Yarzi gexrddo bei dae mel leil pa nia mae nr ddo,
ni ddei jjiumo zex leil ssi a dder ddo a; yaa dax bei dax nr ddo.
- ¹⁶ Ca nr seir mel nr seir nr bei a yixrmeixl jjiu nr ddo,
ca leil nr ke a yixr dae lei sor-nr-sar.
- ¹⁷ Yarzi gexrddo bei hal mel yaa ddei loxlmoxr,
yarzi duxr bei hal mel yaa ddei zzibbaer.
- ¹⁸ Botaddu nr zza ca mel ddei jjiumo zex merteir a bbelele ddei sael a nga,
ho zoxl ho bbele, hherdder bbele gaxzi zzezze ci.
- ¹⁹ Nixmox neix su ca mel ddei jjiumo zex neixmarmarmo,
yaa lei arddolyoxl yaa leil baxlguirle gger a nr saexl.

- 20 Ngo ddei ssor, ni ngo miardal dae mel leil noni nia,
seilseir a ngo mulgger dae mel leil noni nia.
- 21-22 Yaa leil liwo a meldder olga liwo a;
cirkge-circir lei zzasoso a nga a;
yel yaa leil ni meixddur zze dax bbekae lol nr ddo,
velver a nixmoxzzar holcir dae nia.
- 23 Ca mu cir se arsae lerler nga mel nixmox zzar ddux lei,
yel ni ddei nixmox taex leil guaxr a bir cirza-hanga leil guaxr
seir leixl nia.
- 24 Nga nr zi ddar mel cirqir lei bbeix nr ddo;
cafur dae ddar mel biar nr ddo.
- 25 Meixddur zze xilmeir piar a gga malma i dae nia,
meixddur zze xilmeirbbaer zzalzzar a i dae nia.
- 26 Ni qihher woxrke jjiumo zex bbaelbbae a ggu mal nia,
ni ssi dae jjiumo hazza velver a ssi nia.
- 27 Baelbaelsi vael piar a yo piar a gga ssi mal nr ddo,
yarzi gexrddo hal mel dax naer nrddo.

Kerjjar (Su Dax Naer) Nr Ddo

- 5** ¹ Ngo ddei ssor, seilseir a ngo ddei olnol ddu ddar mel leil noni
nia,
nolba ddei duxgex dae a, ngo ddei yarzi jilixr ddar mel leil noni
nia.
- ² Einenga a ni azo lerler bei a dder fae dae sael a;
ni ddar bbeix teixl lei mel lei olnol ddu.
- ³ Kerjjar su maerssor ddei meir qir bbiurvi sael a ci vilvil mo,
saercor ssuvi sael a maeryoxlyoxl mo.
- ⁴ Nael maelele ci a veixlkor sael a kar;
altorser nr piar niar dae altor mel sael a teix.
- ⁵ Yar ddei qihher zze ca leil si lol ggie hal maex ssi mal,
yar ddei cibbi mel yiji gga ssi mal.
- ⁶ Yar olga zza jjiumo kuaxkuax zex leil nr ssi,
yar hoxrhoxr jjiumo zex leil ss pixr a lei yar armael nr saexl.

- 7 Ssor mel ngo ddei ddar no nia,
ngo ddei ddar mel dax bei nr mae bei nr ddo.
- 8 Kerjjar su ssormaer mel dax vimirmir mo bbekae nia,
yar ake dax naer ssi nr ddo.
- 9 Nrnga a ni middux ddu mel kebal ca leil gger var,
ni leixlgger-leixlla dder aelgaxr su ca mel leixrga gga si zil dae
a.
- 10 Nrnga a, piar nr saexl su ca mel ni ddei zzirbae mel vei si,
ni sulku si lei mel kebal ca ddei loxr.
- 11 Ni si car ggecir ddei lei xiaxr a;
ni norlir ae doxr dae a,
- 12 bbeix: “Ngo arsaenga a mulgger dae mel leil no-nr-ni?
nixmox zzar bota dae mel leil izei.
- 13 Sulmulsu ddei ddar lei nr no,
ngo leil mulgger su ca ddei leil lei seirseir a no-nr-ni.
- 14 Ngo leil bei vuxryixr dae mel neixleixr sael sixilwormeir ngo
leil ddeix a.
- 15 Ni armael ddei ajjix bbeddur gga ajjix mel dda nia,
armael ddei lurddur gga ajjix mel dda nia.
- 16 Ni ddei lur ddux ggie ajjix mel arsae zalbbaer pe dae lol cexr
bbeixleir?
ni ddei lazzar a gga ajjix mel arsae zzijiul gga pe dae lol cexr
bbeixleir?
- 17 Eilmelmel ni ddei larnga,
kebal ca dax cirgo a sser nr ddo.
- 18 Ni ddei lur ddux ggie ddei leil seirseir liwo lol nia,
ni leixltor seir bbeix maerssor ddei leil ggese nia.
- 19 Yar mel yarzi naxrcixl yarzi nolnger ddo cimodo mel sael a
nga,
yar xilbebbor ddei arddolcar lei ni leil nixloxldda lol nia,
ni leil yar ni leil seissaexr dae mel leil holcir milsi lol nia.
- 20 Ngo ddei ssor, ni arsae nga a kerjjar su ssormaer mel leil
nolnger?

Arsaenga a ggecir vurlel su ssormaer mel ddei xilbebbor ddei leil deix gex dae?

- ²¹ Ca mel bei dae hazza lei Yihexrhuaxr ddei meixddur a gga mia dae,
 yar ca mel ssi dae jjiumo hazza leil i dae.
- ²² Nixmox neix su ca mel yar armael ddei zuixl mel yar leil ssu gex dae a;
 yar armael ddei zuixl mel yar leil neixlgex dae a.
- ²³ Yar mulgger dae mel leil no-nr-ni a si a;
 yoxl medeil zildu a jjiumo ssi cox a.

Zeixleixr Quex

- 6** ¹ Ngossor ni gaxrggor cabeix leil weixr a barzexl gger su ca bei, piar-nr-saexl su ca mel leil weixr a bbeixharzaxr arddeirnga a,
² Ni meir gga ddar mel dder ni leil ssoxgex dae a;
 ni meir gga ddar mel ni leil ssu gex dae a.
- ³ Ngo ddei ssor, ni gaxggor-carbeix leixrga gga hher ji dae ho a mel,
 ni dder col nr ddo, gaxggor-carbeix lei qiuxr ssi nia,
 eine bei a saelnei armael leil jiuxl cexr.
- ⁴ Ni ddei meixddur zze leil yixrmeixl jjiu lol nr ddo,
 ni meixzzigel ddei leil yixrmeixl dox lol nr ddo.
- ⁵ Armael leil jiuxl nia,
 hherdder ngax mel bel gga jiax teixl lei sael a nga,
 ci mel ciddaexr su leixrga gga pa teixl lei sael a nga.

Bbaeyo Nr Ddo

- ⁶ Cabbayo,
 ni bberyox mel bei dae mel leil i a dder olnol ddu var.
- ⁷ Bberyox mel yaa leil hier su nr zza,
 vaervaerpor nr zza, zzirmar nr zza.

- ⁸ Nael halae gielco zi loxlmoxr geso zaxr,
 loxlmoxr se zi car a loxlmoxr se pex zaxr.
- ⁹ Cabbaeyo, ni arddolcar yixr ci niazzir dae?
 Ni arddolcar a sael yixr zucur neil?
- ¹⁰ Zeixleixr arleixr yixr, yixrmeixl arleixr dox,
 leixrhher ddei deix gex dae a arleixr guixr a,
- ¹¹ Ni dder sol du a; hherdder zzaegu su su mel ni dax su lei sael a
 nga,
 ni sserddu lei nr zza a; hherdder ca aelgaxr mel zzi deil ddu vei
 dae a ni leil ddaexr lei sael a nga.

Yihexrhuaxr Vuxryixr Dae Mel

- ¹² Capia nei vurleixl-vurzir bei su mel meir gga,
 habbeix-nrbbeix dder ddarjiar te.
- ¹³ Yaa cirjjixr-meixjjixr ciqix-leixrqix bei a,
 nixmox zzar xiar ji dae mel zzi leil saexl lol.
- ¹⁴ Yaa nixmox zzar cirdoxr lei nr seir,
 arddolcar a lei yarzi gexrddo mel leil lar xiar,
 ca leil zzi dax zex lol hal mel biar.
- ¹⁵ Yel goxrsol-goxrnaxr mel neixleixr sael yaa leil ddeix nia,
 saexlloci a qie yaa leil bei zil jjia gger a, jiuxl lei jiuxl nr cexr a.
- ¹⁶ Yihexrhuaxr vuxryixr dae mel qiuxlyoxr zza.
 Yar nixmox zzar vuxryixr dae yoxr jiujiu a mel sir yoxr zza.
- ¹⁷ Hherdder ca leil i nr du meixddur zze,
 ddarjiar te lo ddei,
 si mi-nr-bbe ca mel leil sirnilni ddux lol leixrhher zze,
- ¹⁸ yarzi gexrddo xiar meixr nixmox taex,
 yarzi gexrddo bei ssi a ggerggelgger beix dae qihher zze.
- ¹⁹ Ca ser ggie ddarjiar te su nei arzzi-nimar mel leil zzi dax zex
 lol var ddar hal mel te su mel nga a.

Kerjiar Su Mel Goxrsol-Goxrnaxr Goxr Nia

- 20 Ngo ssor niabbor miardal dae mel dax seilseir a bei mae dae
nia,
niama [mulgger dae***] mel leil nrli bei nr ddo,
- 21 arddolcar lei ni nixmox zzar ji dae nia,
leibbei leil ddexr dae nia.
- 22 Ni jjiumo ssi car a, yar dder ni leil hier dae;
ni yixr dae car a yar dder ni leil su dae,
ni yixr zucur car a yar dder ni dax ddar biar.
- 23 Miardal dae mel de zar nga a;
mulgger dae mel bbelele ddei nga a;
mulgger car a bota dae mel olga zza lol ddar mel nga a.
- 24 Ni leil nixmox neix su ssormaer mel dax nr naer ssi lol,
ni leil meir ddei yarzi bbeixvar ggecir vurler su ssormaer mel
leil ssaxl pixl lol.
- 25 Ni nixmox zzar yar zae ggiebbaer nolnger nr ssa,
yar meixddur zze ni leil nol si lol nr ddo.
- 26 Ggecir vurler su ssormaer mel ca leil aba lar cir pir zza loxr lol
var,
kerjiaer su ssormaer mel ca leil olga lei pixl lol var.
- 27 Ca mel xilbebbor gga adoxl kerzi dae a mel pia ddei cu nr du
lei arddollei bbeixleir?
- 28 Ca mel saernir taxl leil ssi dae a mel qihher zze leil taxl-nr-no
arddollei bbeixleir?
- 29 Kebal ca ddei maerssor dax kerjiaer su ca mel lei eilmel sael a
nga,
ha yar dax naer su ddei leil mel nr faxr arddollei bbeixleir?
- 30 Zzaexpor mel meixr a ker ssi arddeirnga a,
ca mel yar leil i nr zeir,
- 31 nael yar leil ssugex dae arddeirnga a,
yar dder sirpeix koxlgger nia,
ake zza dae maelmaerjia vei teixl lei zzorbbeix lei koxlgger
nia.
- 32 Ssormaer dax kerjiaer ssi su mel yarzi medeil,
eine bei a mel armael leil olga pixl lol lalnga.

- ³³ Arsae bei lei yar leil deil, yar leil beivuxryixr,
yar leil bei vuxryixr dae mel vei lei vei pixl nr cexr.
- ³⁴ Capor ddei ca hal ddei nixnox du lei a adoxl sael a bbiu du lei a;
yar bei koxlxixl car a zoxlnixr nr var.
- ³⁵ Yar leil azo peixr a lei yar li nr var,
yar leil zzaegu hormo ho a lei yar nor zei lei nr var.
- 7** ¹ Ngo ssor, ni ngo ddei ddar mel dax bei mae dae nia,
ngo miardal dae mel leil nixmox zzar ji dae a holcir dae nia.
- ² Ngo miardal dae mel dax bei mae dae a dder gol dae cexr,
fa dae a ngo mulgger dae mel dax bei mae dae nia,
hherdder meixddur ga gga meixsaer taex leil fa mel sael a nga.
- ³ Leixrni leil neixlgex dae nia,
nixmox zo leil kaexl deix dae nia.
- ⁴ Olnoyddu ddei leil ni ddei arzzi-nimo bei lol nia;
jilixr ddei leil ni ddei cirssor bei lol nia.
- ⁵ Yaa dder ni leil guaxr dae a kerjiar su ssormaer mel dax nr naer
ssi lol,
ddar noni zaezae mo te su ggecir vurlel su ssormaer mel dax
nr naer ssi lol.

Kerjiar Su Ssormaer

- ⁶ Halleix ngo ngua ake cuaho dax,
cualixr mel gga zalbbaer i teixl a,
- ⁷ yarzi meldeil leixlsu mel gga,
cirza lei nr saexl leixlsu ar ddei zza,
- ⁸ yar kerjiar su ssormaer mel dax naer dae zzijiul zex gga ssi gel
a,
kerjiar su ssormaer mel ddei ake dax hal piar a gga ssi mal ggie
mia a.
- ⁹ Yar mercixl car leil bbeixsael eilmerxixl, bbeixsael
soxiu-baxlyixl, bbeixsael neixmarmar car leil jiux dae.
- ¹⁰ I ddo a! Ssormaer ar ddei ddux lei a yar leil zi lei a;

- ssormaer hal ddei ggecir vurler su mel sael a zua dae,
nixmox zzar yarzi gexrddo xiar ji dae.
- ¹¹ Ssormaer eil ddei bbixbbix-bbaxbbax mo guaxr wor nr ddo,
aniuxlniux a ake hher ssei nr ddo.
- ¹² Cirdaedae a zzae zzijiul gga hher dae,
cirdaedae a zzae kuaxggie bbeixsael zzijiul jjiucaxl dax su dae.
- ¹³ Yar caleixlssor mel leil gga gex dae a yar dax meir jiuxl,
Seixlda lei nr saexl yar leil bbeix:
- ¹⁴ "Zzaso lol qiuxr a zi ddu mel ngo dax eilmaex zzae dae,
ngo eilni saelnei ngo bbeixhar goxr mel bei a ngaseir.
- ¹⁵ Yel ngo ddux lei a ni leil zi lei,
ngo yarzi ni leil mia loxia a jiajia ni dax zzi a.
- ¹⁶ Ngo vixlux naexr deix dae jiuddu nei Aezixr goxrjia ddei
maebbiur sser a vixlux naexr ddaexr dae karddu mel,
ngo ddei yixrgguci leil kar dae ho a.
- ¹⁷ Ngo moxlyoxl, cexrxia nei guixlpixr sser a ngo ddei yixrgguci
leil sil goxr ho a.
- ¹⁸ Ni lei a niul cirgo a bboxlbox a hher a merteir zzezze hher ci
cexr;
niul ggegge-sese a zzi dax xixl cexr.
- ¹⁹ Ngo capor mel ake nr hher dae,
yar jjiumo vimir ggie ssi a;
- ²⁰ yar leixrhher gga piu lixlba vei dae a, eilxiubbo jjia a sael jjixr
lei a."Eine bbeix.
- ²¹ Kerjia su ssormaer mel ddar noni zaezae cirke bbeix a, yar
leil nol a yar dax mae lol,
yar yarzi bbeixvar meir qir yar leil bixr a yar dax cirgo a ssi lol.
- ²² Leixlsu ddei dder qixrqixlqixr yar dax mae, hherdder niur mel
yar leil seixl ggie ssi sael a nga;
yoxl ca meldeil mel serkar ddexr dae a yar leil faxr ggie ssi sael
a nga,
- ²³ jir baex yar nixmox zo gga ddaexr dil zzezze ci;
ngax mel nialngal sael bel gga ddir sael a nga,

nael armael ddei armmael leil olga pixl lol a lei yar nr saexl.

²⁴ Ssor mel, eilcar a ngo leil noni nia,

seilseir a ngo meir gga bbeix dae ddar mel noni nia.

²⁵ Ni ddei nixmox taex leil kerjiar su ssormaer mel dax mae ssi lol nr ddo,

yar ni leil fur wo lol nr ddo.

²⁶ Yar mel ca cirke leil olga pixl lol ho a;

yar seixlzil gger ca mel lei yarzi sael miur.

²⁷ Yar ddei ake ddei mel yiji gga ssi dae jjiumo zex nga a;

ca si ho a hher ggie zeii ggie hal maex nga a.

Olnolddu Ddei Leil Bbeizaegger

8 ¹ Holbbaexl olnolddu ddei nr ae dae a ngo?
Jilixr ddei qirurte bbe-nr-jjiur a ngo?

² Yar jjiumo qir leil darmumu ggie ngier dae,
zzijiul gga jjiucaxl dax hher dae.

³ Zzi gielmi dax, alddur ddir ggie worcixl-worni ae dae a bbeix:

⁴ “Cassor-worssor mel ngo nia leil ae.

Ngo merwoxrke cassor-worssor mel leil ae a bbeix:

⁵ ‘medeil a azo lei nr saexl su ca mel,

nia fa dae saexl nia,

medeil a waxrgul su ca mel,

nia seilseir a bbekae saexl nia.

⁶ Nia noni dae, ngo ddarseir-ddarzae biar nia;

ngo meir ngaxl du lei a hoxrhoxr mel leil biar nia.

⁷ Ngo meir gga ddarzi mel leil biar teixl lei nia,

ngo meir qir yarzi gexr ddo mel leil vuxryixr.

⁸ Ngo meir gga ddar maelmaerjjia hoxr,

nrhoxr cir qir lei nr zza.

⁹ Ngo ddei ddar mel olnoddu su ca mel saexl,

cirza-hanga saexl su mel lei eilmel sael a zzirdae.

¹⁰ Nia piu li nrnga nei ngo mulgger dae mel leil li nia;

sae tiur nrnga a nei cirza-hanga saexl mel leil tiur nia.

- 11 Olnolddu ddei bir helvirsær naxrcixlcixl mel leil perniar leixl,
cirza-hanga zaelzæ hazza lei yar dax bir nrbbe.
- 12 Ngo mel olnolddu ddei nga a; ngo cirza-hanga saexl ddei dax
hher ji dæ,
yoxl sul saexl nei cirza-hanga xiar teixl lei xi ddei leil zowo a.
- 13 Yihexrhuaxr leil gexr a idu a mel yarzi gexrddo mel leil
vuxryixr nia.
ngo yarzi col, olvæ, yarzi gexrddo ddar nei ddarjær mel leil
vuxryixr.
- 14 Ngo cirza-hanga xiar teixl lei xi nei yarzi sul saex,
yoxl cirza-hanga saexl bbesur zza.
- 15 Zzirmar mel ngo leil koxl dæ a zzirmar baxrde taex leil cux;
værværpør mel ngo leil koxl dæ a bbaehhexhex dixl.
- 16 Zzirmar ddei ssor nei værværpør,
halæ ca leil ser su hazza lei ngo leil koxl dæ a bbaehhexhex
a ca leil ser.
- 17 Ngo leil perniar su ddei ngo lei yar leil perniar,
zixlkur-zixllixl ngo leil zo su ddei arsæ bei lei zo wo ddo.
- 18 ****Ngo mel be, arseir lei ngo leil idu,
ngo cirza-hanga lei zza, ngo bei dæ mel hoxr.***
- 19 Ngo ddei sær mel bir sæ lillil mel leil lei naxrcixl leixl,
ngo dax ddux lei mel bir piu lillil mel leil lei naxrcixl leixl.
- 20 Ngo hoxrhoxr jjiumo zex leil ssi dæ,
bbaehhexhex jiumo zex gga ssi dæ.
- 21 Ngo ngo leil perniar su mel leil zzirbæ nei zzaegu ggernia,
yaa zzaegu ji ggie dol bbi lol nia.
- 22 Yihexrhuaxr coxl beil car,
azo lei nr zza seir, cirza-hanga coxl xilmeir leil ngo dder zza
dæ ho a.
- 23 Halcar tortor cirdæ, arzo lei nr zza seir cirdæ,
middurbbor ddei lei nr zza seir xilmeir leil ngo dder hher dæ
ho a.
- 24 Ajjix darneixlneixll mel nr zza seir,

- pe dae lur mel nr zza seir ngo leil dder xiu ho a.
- ²⁵ Worga vaervaer mel yarzi bbor ddei lei nr coxl seir,
worga yelye mel lei nr zza seir ngo leil dder xiu ho a.
- ²⁶ Yihexrhuaxr halae middur nei mi mel leil nr coxl seir,
middurbbor nilhar mel leil lei nr coxl seir ngo leil dder xiu ho a.
- ²⁷ Yar merlabbor coxl car a, ngo halmaex hher dae,
yar ajjix darneixlneixl mel zaza-lili valili huax teixl lei.
- ²⁸ Ngaxrsibbor nael merlabbor ddei leil ssei lol,
jiasibbor nael ajjix darneixlneixl mel leil velver a nga lol.
- ²⁹ Yar neixvi gga ajjix mel leil addolmaex zzezze a ssi ci ddo dixl
gger,
ajjix mel leil yar dixl gger dae ddei leil lal nr gel lol,
yar middur yarzibbor ddei leil velver a zza dae lol.
- ³⁰ Halcar a ngo yar dax halmaex cirza-hanga coxl su bei dae,
cirni-cirni yar leil ggeese lol,
arddolcar lei yar meixsaerqir leil ggeese a tiuxl dae.
- ³¹ Ggesese a tiuxl dae a yar ca leil beiharzaxr gger dae hherggie
ddei gga hher dae,
ngo lei cassor-worssor mel dax hher dax ggeese.
- ³² Ssor mel, eilcar a ngo leil noni nia,
seirseir a ngo ddei ddar mel dax bei mae dae a ngo dder ni leil
seir lol.
- ³³ Mulgger dae mel leil noni a dder olnolddu a;
eilmel leil nr li bei nr ddo.
- ³⁴ Ngo leil noni, cirni-cirni ngo alddur ggucirmi i dae,
ngo ddei alddur peixl dax hher dae a xia dae su ca ddei ngo yar
leil seir lol.
- ³⁵ Ngo leil zo wo a meldder olga zo wo a;
Yihexrhuaxr lei yar leil seirseir meixl gger.
- ³⁶ Ngo leil zo nr wo a meldder armael leil ke,
ngo leil vuxryixr a meldder si ddei leil nolnger.”

Olnol Ddu Nei Medeil

- ⁹ ¹ Olnolddu ddei yar ddei xi zi a,
 sseigu sir taex ddaex rteixl lei,
² yar zzeir seixl, zzibbaer ddacidde ggiex,
 zzorci-ddami ho teixl lei.
³ Yar leil vissersu ssormaer ddei leil miardal teixl a seivi qie ssi,
 yar armael lei zzi gga muggie ae dae a bbeix:
⁴ "Ca medeil, eilmaex lei ddo a!"
 yar yoxl azo lei nr saexl ca ddei leil bbeix: ⁵
⁵ "Ni lei a ngo ddei aba zzor,
 ngo ggiex teixl lei zzibbaer mel dda.
⁶ Nia ca medeil mel, medeil ddei leil li nr ddo a;
 yel dder gol dae cexr, halae bbelele jjiumo zex leil ssi nia." eine
 bbeix.
⁷ Col su ca leil nr hoxr bbeix gger a armael leil hie no ddu zo
 langa,
 nixmox neix su ca leil bota a armael leil keddu zo lalnga.
⁸ Col su ca leil bota nr ssa, nrnga a yar ni leil vuxryixr,
 olnolddu su leil bota nia, yar arsaebei lei ni leil nolnger.
⁹ Olnolddu su leil mulgger a, yar gielgiel olnolddu,
 nixmoxseir su leil mul gger a yar dder cirza-hanga saexl dax.
¹⁰ Yihexrhuaxr leil gexr nei idu a mel olnolddu du lei beil;
 seirceix-seirmaer halddei leil saexl a mel dder jilixr a.
¹¹ Olnolddu ddei ni leil nixixl mel miur dax lol,
 ni leil olga si dax lol.
¹² Ca mel olnol ddu a armael dax seirggiebbbaer zza,
 ca mel si leil vaessi meixr a mel, nrseir mel armael leil ddeix.
¹³ Medeil ssormaer ddei bbixbbix-bbaxbbax ae dae;
 yar mel medeil, cirza lei nrsaexl.
¹⁴ Yar armael ake ggucirmi cux dae,

- zzijiul gga darmumuggie baxrdae leil cux dae a,
¹⁵ jjiu mossi gel lei su ca mel leil ae,
 hherdder zzalzzar a jjiu mo gga ssi gel lei su ca melleil ae dae a
 bbeix:
¹⁶ “Ca meldeil, eilmaex lei ddo a!”
 yar yoxl azo lei nrsaexl ca ddei leil bbeix:
¹⁷ “Ker dda ajjix mel ci,
 ker lel aba melxiu.” Eine bbeix.
¹⁸ Nael ca mel zzael ca leilsil lol su ddei yar dax halmaex hher
 dae,
 yar ddei seivi mel yiji darneixlneixl ggie hher dae nrsaexl.

Sorloxrmexr Ddei Olnolddu Ddar

- 10** ¹ Sorloxrmexr ddei olnolddu ddar mel:
 olnolddu ssor ddei arbbor leil ggese lol,
 medeil ssor ddei ama leil zoxrzixr lol.
² Nrseir bei a liwo zzirbae mel seirggiebbæer cir doxr lei nr zza,
 bbaehhexhhex a bei a larnei ca leil nr si lol jiuxl teixl lei cexr.
³ Yihexrhuaxr nixmox seir su ca mel leil nr meixr dae lol;
 nixmox neix su ca mel nolnger dae mel yar dder pixl gger.
⁴ Baeyo a mel ca leil sol lol;
 sulkuddo a mel ca leil be lol.
⁵ Jilixr ssor ddei gielco zi loxlmoxr se pex,
 ca cexr-nr-ddo ssor ddei loxrmoxr se zi yixr doxr.
⁶ Seirseir meixl gger dae mel nixmox seir su ca ddei oldde leil
 ddeix,
 nixmox neix su ca ddei meir yarzi gexrddo mel lillil a nga.
⁷ Nixmox seir su ca ddei leil arseir lei holcir,
 nixmox neix su ca ddei nael ddux lei ddux bei nr ddo a.
⁸ Nixmox zzar olnolddu su ddei bei nr ddo miardal dae mel leil
 noni,
 ddar te a meldeil su ddei armael ddei armael leil ke.
⁹ Jjiu mo hoxrhoxr zex leil ssi su mel cirbbi-hanga lei baver,
 jjiu mo nr hoxr zex leil ssi su mel arsæe bei lei dezei.

- 10 Nixmox zzar nrseir mel kerzi su mel ca leil cix lol,
arsae xiar dae mel ca leil quex a mel ca leil zzi dax toltor a nga
lol.
- 11 Nixmox seir su ca mel ddei meir ddei olga vi ddux lei ggie,
nixmox neix su ddei meir gga yarzi gexrddo lillil a biar.
- 12 Vuxyixr a mel ca leil zzi dax zex lol,
perniar a mel zuixl hazza leil bbe gex dae cexr.
- 13 Cirza-hanga saexl su ca ddei meir gga bbeix dae mel olnol ddu,
medeil su ca ddei zzoxrbbeix leil zzargger deil.
- 14 Olnolddu su mel cirza-hanga saexl dax,
olvaer su ca ddei meir qir hoxl cuar doxr.
- 15 Be su ca ddei zzirbae mel yar ddei yarzi ssei lu ddei nga a;
sol su ca mel azo lei nr zza a yar leil ke.
- 16 Nixmox seir su ca mel sulku ddo a gol dae cexr,
nixmox neix su ca mel si lalnga.
- 17 Mulgger dae ddei dax mae dae a mel olga zza jjiumo zex leil
ssi dae a;
bota dae ddei leil nr li a mel jjiumo ssi pixl a.
- 18 boxyox dae mel kerzi dae a meldder meir gga ddarzi lei nr zza
a;
meir gga ca leil nrbbba-nrbbba bbeix su ddei mel dder olvaer su
ca ddei nga a.
- 19 Ddarmiar a mel bbeix nr cox leiddur nr zza,
meir ddei leil guaxr dae a meldder olnol ddu a.
- 20 Nixmox seir su ca ddei lo ddei piu naxrcixl sael a nga;
nixmox neix su ca ddei nixmox taex azo lei nr per.
- 21 Nixmox seir su ca ddei meir qier ca cirke leil mulgger;
medeil su ca ddei azo lei nr saexl a si a.
- 22 Yihexrhuaxr seir lol dae mel ca leil be lol,
cixddu ca nr dax.
- 23 Nixmox neix su ca mel zzirdae a gexrddoddo mo bei a
gaxggorseir,
cirza-hanga saexl su ca mel nael olnolddu a ggese.
- 24 Nixmox neix su ca mel gexr dae mel arsaе bei lei yar leil ddeix,

- nixmox seir su ca mel nga loxia dae mel hal mel sael a nga a.
- ²⁵ Mersi vaervaer ar pu jia gel a nixmox neix su ca mel leil dder nr mia a;
nixmox seir su ca mel nael addolcar ci a lei velper a nga.
- ²⁶ Cabbaeyo leil zi a mel, zeilzei ddei ser cir lol, alker ddei meixddur leil si lol sael a nga.
- ²⁷ Yihexrhuaxr leil gexr a idu su ca ddei olga si, nael nixmox neix su ca ddei arsae bei lei olga niul.
- ²⁸ Nixmox seir su ca ddei ngaloxia dae ddei yar leil ggese lol var, nixmox neix su ca ddei ngaloxia dae ddei nael arae bei lei mier.
- ²⁹ Yihexrhuaxr ddei ddar mel bei hoxr su ca ddei leil guaxr dae, nael nixmox neix su ca ddei leil bei zil gger.
- ³⁰ Nixmox seir su ca mel arddolcar ci a lei velper a nga, nixmox neix su mel nael middurbbor hher wo nr ddo.
- ³¹ Nixmox seir su ca ddei meir gga olnolddu ddar biar teixl lei, ca fu dae lo ddei leil arsae bei lei caer te gger nia.
- ³² Nixmox seir su ca ddei meir qier ca leil ggese lol, nixmox neix su ca ddei meir gga cafur dae ddar mel bbeix.
- 11** ¹ Cex nrhoxr mel leil Yihexrhuaxr vuxryixr, cex bbaehhexhhex mel leil nael yar nolnger.
- ² Col su ca ddei dax mel seixldaddu ddei mae dae; nr col su ca ddei nael olnolddu.
- ³ Nixmox seir su ca ddei hoxrhoxr bei dae mel yar armael leil hier dae;
jiuxr su ca ddei yarzi jiuxr bei dae mel yar armael leil ke.
- ⁴ Seifu faex nixixl ddei ci a, zzirbae ddei seirggiebbbaer nr zza? bbaehhexhhexmo bei dae mel larnei ca leil nr si lol jiuxl cexr.
- ⁵ Botaddu nr zza ca ddei seirseir bei dae mel yar leil jjiumo ssi seir ggie ssi lol;
nael nixmox neix su ca ddei yarzi gexrddo bei a dezei a.
- ⁶ Nixmox seir su ca ddei seirseir bei dae mel armael leil jiuxl, jiuxr su ca ddei nael armael ddei zuixl mel gga haxl ji dae a.
- ⁷ Nixmox neix su ca ddei si a qie yar nga loxia dae mel lei mier a;

yar zzirbae leil waxlkoxl dae ddei lei za xixl lei a qie cirza lei nr zza a.

- ⁸ Nixmox seir su ca ddei leil goxrsol-goxrnaxr mel gga jiuxl teixl lei,
nixmox neix su ca ddei nael goxrsol-goxrnaxr mel gga ddir a.
- ⁹ Arbosobo dax bei nrmae su ca ddei meir gga yar dax goxrnaer dae ca mel leil nrbba-nrbba bbeix;
nixmox seir su ca ddei leil nael cirza-hanga saexl a jiuxl wo.
- ¹⁰ Nixmox seir su ca ddei goxrseir a zzi cirddeir-lorbba lei ggese;
nixmox neix su ca ddei si a ca cirddeir-hanga lei ggese a ae dae.
- ¹¹ Nixmox seir su ca ddei zzi ddei leil seir lol a zzi ddei oxnix du lei;
nixmox neix su ca ddei meir gga ddar mel nael zzi ddei leil de zei lol.
- ¹² Olnol nr ddu ca ddei yar dax goxrnaer dae ca mel leil i ze; cirza-hanga saexl su ca ddei meir ddei mixgex dae ajjiuljiu a hher.
- ¹³ Ddar miur su ca ddei saexl lol nr ddo mel lei biar teixl lei;
ddarzzi ddo ca ddei meirssei.
- ¹⁴ Olnolddu su ca nr zza a mel cassor-worssor mel dder nixixl goxr nr cexr,
zuxryix ddux su ca miur a mel cassor-worssor mel dder zzasoso a nixixl goxr dae cexr.
- ¹⁵ Piar-nr-saexl su ca mel leil weix a, barzexl gger su ca bei bei a mel arsae bei lei cixrkui;
barzexl gger su ca bei nr meixr a mel dder zzasoso a goxr dae cexr.
- ¹⁶ Ca mu var ssormaer ddei ca mel yar leil i du ddei leil liwo;
gexrddoddomo bei su capor ddei zzirbae liwo.
- ¹⁷ Nixmox nor su ca ddei armael leil seir lol;
nixmox duxr su ca ddei armael leil ke.
- ¹⁸ Nixmox neix su ddei beiwo melmel pox xixl lei a qie azo lei nr zza a;

- seirseir bei a larnai arddolcar a sseirseir gger mel li wo ddo.
- ¹⁹ Hoxrhoxr beigaxzi su ddei arsae bei lei olga li wo ddo;
yarzi gexrddo bei meixr su ddei arsae bei lei si.
- ²⁰ Nixmox zzar nrseir xiar su mel Yihexrhuaxr vuxryixr;
botaddu nr zza ca mel leil Yihexrhuaxr ggese.
- ²¹ Nixmox neix su ca ddei leil arsae bei lei faxr;
nixmox seir su ca ddei giedae ca mel leil arsae bei lei jiuxlwo.
- ²² Ssormaer mel zae bbeixarnar azo lei nr saexl a mel,
sae nolzzu ddei veixr noxlbbex leil ddexr dae saexl a nga.
- ²³ Nixmox seir su ca ddei nixmox zzar xiar dae mel seirseir bei
teixl lei lol;
nixmox neix su ca ddei nga loxia dae mel ca leil seifu faex lol.
- ²⁴ Ca leil gger ggese a mel ho bei ho bei;
zidael a mel ho bei ho sol.
- ²⁵ Hoxrcixlcixl mo gger a mel arsae bei lei be;
si leil seir lol su ddei leil arsae bei lei seir lol.
- ²⁶ Loxlmoxr zaxr dae a nr vur su ca ddei, cassor-worsor mel
arsae bei lei yar leil hieno;
loxlmoxr vur yuex su ddei cassor-worsor mel arsae bei lei yar
leil seir lol.
- ²⁷ Seir mel bei meixr a mel seirseir liwo;
yarzi gexrddo mel bei meixr a mel goxrsol-goxrnaxr pex dae.
- ²⁸ Armael ddei zzirbae leil koxl su mel arsae bei lei dezei;
nixmox seir su ca mel nael oxnix du lei a, yarpeixl mel
nibaexbaexmo vax du lei sael a nga.
- ²⁹ Armael ake hhexr leil ke su mel arsae bei lei cirza lei nr zza
loxr;
medeil su mel olnol ddu su mel ddei zebol bei.
- ³⁰ Nixmox seir su ca ddei niar teixl lei saer mel olga zza lol var
sixzzei sael a nga;
olnol ddu su ddei arsae bei lei ca liwo ddo.
- ³¹ I ddo a! Nixmox seir su ca ddei middurbbor hher dae car lei
yar leil bei koxl xixl mel,

nixmox neix su ca nei zuixl bei su ca leil bei koxl nr xixl arddol
lei bbeixleir?

- 12** ¹ Guaxr dae mel leil nolnger su ca ddei cirza-hanga saexl
nolnger;
bota dae mel leil vuxryixr su ca ddei mel medeil zzir ddei nga a.
- ² Ca seir ddei leil Yihexrhuaxr arsae bei lei yar leil seirseir meixl
gger;
jiuxr su ca ddei leil Yihexrhuaxr arsae bei lei yar leil zuixl dixl
gger.
- ³ Ca mel yarzi gexrddo bei ddei leil koxl a velper a zza dae nr
cexr;
nixmox seir su ca ddei bei dae ddei velper a zza dae.
- ⁴ Ca muvar ssormaer ddei yar capor oldde leil ddexr labox
naxrcixlcixl ddei sael a nga;
seixlda nr saexl ssormaer ddei yar capor ddei hherggar leil nor
niar dae sael a nga.
- ⁵ Nixmox seir su ca ddei xiar dae ddei hox, bbaehhex;
nixmox neix su ca ddei xiar dae ddei duxr, jiuxr.
- ⁶ Nixmox neix su ca ddei ddar mel ca lei seixl zil ddo sael a nga;
nixmox seir su ca ddei ddar mel nael ca leil jiuxl cexr.
- ⁷ Nixmox neix su ca ddei mier a azo lei nr zza a;
nixmox seir su ca ddei giedae ca mel velper a zza dae.
- ⁸ Olnolddu su ca ddei leil arseir lei kuar gger;
nixmox zzar nr seir xiar su ca ddei leil aseir lei i ze.
- ⁹ Quexrlixl nr zza bbeixarnar, yar leil visser su zza a mel,
bir armael ddei armael leil i mu gger a zzorddu nr zza leil seir
leixl.
- ¹⁰ Nixmox seir su ca ddei yar ddei zzeir mel leil zoxlnixr;
nixmox neix su ca ddei zzeir mel leil yarzi gexrddo bei zil gger.
- ¹¹ Armael ddei mi paxr a mel zzorbbox ddu zza;
nga-nr-zi mel dax bei mae su mel yarzi medeil.
- ¹² Nixmox neix su ca ddei, ca nr seir mel nr seir bei a liwo zzaegu
mel leil nolnger;
nixmox seir su ca ddei bei dae mel yarzi barver.

- 13 Nixmox neix su ca ddei armael gexrddodomo bbeix ddar mel yar leil ke;
nael nixmox seir su ca ddei goxrsol-goxrnaxr mel gga ddux lei.
- 14 Meir gga ddar seirseir bbeix teixl lei a mel, seirseir mel bboxbbox liwo ddo;
leixrhher zze sulku ddo a mel arsae bei lei yar liwo mibbe mel liwo ddo.
- 15 Medeil su ca ddei armael zzir dae a yar bei dae mel hoxr;
olnolddu su ca ddei larnei quex dae mel leil noni dil ddo.
- 16 Medeil su ca ddei seifu ddei leil guaxr zeir nr xi;
cirza-hanga saexl su ca ddei nael bbeixvuxryixr dae mel leil lei sser ssei xi.
- 17 Ddarzzi ddo ca ddei ca leil ddar bbeixjjiu car a ddarzi te;
ca leil ddar bbeixjjiu car a ddarjiar te su ca ddei meir gga ddar mel ca fu dae lillil a nga.
- 18 Gadu-gaqix ddar te su ca ddei altor baex ca leil zzir sael a nga;
olnolddu su ca ddei ddar mel ca leil no ggukor gger cexr.
- 19 Meir gga ddarzi te a arddolcar ci a lei velver a zza dae,
lo ddei ddarjiar te a cirleixr dder mier a.
- 20 Yarzi gexrddo bei meixr su ddei nixmox zzar jiuxr,
ca leil quex a toltor a nga lol su ddei arddolcar lei ggese.
- 21 Nixmox seir su ca ddei nr seir pex nr dae;
nixmox neix su ca ddei nael goxrsol-goxrnaxr lillil a pex dae doxr.
- 22 Ddarjiar te meir qir leil Yihexhuaxr vuxryixr;
ddarzzi ddo bei dae mel leil yar ggese.
- 23 Jilixr su ca mel cirza-hanga saexl ji dae;
ca medeil mel nael biar teixl lei mel lei medeil.
- 24 Sulkuddo leixrhher zze querlixl zza;
baeyo su ca ddei asae bei lei goxrsol.
- 25 Nixmox zzar cix a mel ca leil nixmox bbix lol;
nixmox ddervaer dae ddar cirqir a nga lei, ca leil nixmox taex hhel du lei lol.
- 26 Nixmox seir su ca ddei yar dax goxrnaer dae ca leil jjiumo hier;

nixmox neix su ca ddei ca leil jjiumo ssi pixl lol.

²⁷ Ca bbaeyo ddei yar ci ddaexr xixl lei mel lei nr kal;
sulku ddo ca ddei nael zzaegu naxrcixlcixl liwo.

²⁸ Jjiumo hoxrhoxr zex leil ssi dae a mel olga zza;
jjiumo eilzex leil ssi dae a mel si nr var.

13 ¹ Olnol ddu ssor ddei arbbor mulgger dae mel leil noni;
col su ca ddei bota dae mel leil no-nr-ni.

² Meir gga seirseir bbeix teixl lei su ca ddei,
arsae bei lei seirseir mel liwo ddo;
jiuxr su ca ddei yarzi gexrddo mel beimeixr.

³ Ddar te a mabbabba a te su ca ddei armael olga ddei leil jiuxl
cexr,
arsae bbeix niazzir arsae bbeix su ca ddei armael leil kezil
gger.

⁴ Ca bbaeyo ddei nixmox zzar xiar dae a lei baexr a xiar lalnga,
sulku ddo ca ddei nael nixmox zzar xiar dae mel bei cexr.

⁵ Nixmox seir su ca ddei nga-nr-zi mel leil vuxryixr;
nixmox neix su ca ddei bei dae mel yarzi seixlda ddo.

⁶ Bbaehhexhhex ddei nixmox seir su ca ddei leil guaxr dae;
yarzi gexrddo mel zuixl bei su ca ddei leil beix xiaxr gger.

⁷ Be su sael a bei laexl su ddei zzael cirza lei nr zza;
sol su sael a bei su ddei zzael zzirbae nei zzaegu cirke zza.

⁸ Be su ca mel zzirbae sser a olga ddei leil vae xixl lei;
sol su ca mel leil zzael zux lei su nr zza.

⁹ Nixmox seir su ca ddei bbobbolbbo bbo dae ddei sael a nga;
nixmox neix su ca ddei der taex si niazzir dae a.

¹⁰ Col a mel ca leil zzidax zex lol;
quex dae mel leil noni a nael olnolddu.

¹¹ Sul-nr-ku a liwo zzirbae mel arsae bei lei sser pixl jjia;
sulku a zzirbae zaxr a mel arsaebei lei miur dax.

¹² Nga loxia dae ddei leil hormol xia doxr a lei hal mel sael a
nrnga a, ca leil cix lol;
nixmoxzzar xiar dae mel sael a nga a mel nixmoxzzar dder
xicaxr zza a.

- 13 Mulgger dae mel leil izei a mel armael leil kezil gger;
bei nr ddo miardal dae mel leil idu a mel yar leil seirseir bei
koxlxixl.
- 14 Olnolddu su ca ddei mulgger dae mel olga ddux lei ggie,
ca leil si var bel ddei dax bbekae lol cexr.
- 15 Olnolddu ddei ca leil seirseir li wo lol;
jiuxr su ca ddei jjiumo zex ca leil si lol ggie ssi mal.
- 16 Jilixr su ca ddei seirseir a xiarhar a sael bei;
medeil su ca ddei yar ddei medeil mel leil kuar.
- 17 Nixmox neix ddar bbeix gger su ddei goxrsol-goxrnaxr mel gga
haxl ji dae a;
koxl ssei ddo ddar bbeix gger su ddei ca leil toltor a nga lol.
- 18 Mul gger dae a mul vu-nr-ssi a mel arsae bei lei sol a seixlda;
bota dae mel leil noni a mel arsae bei lei yar leil middux lol.
- 19 Nixmox zzar nga loxia dae mel yarzi loxr a nixmox ddei ggese;
yarzi gexrddo mel dax nr naer a, medeil su ca ddei vuxryixr.
- 20 Olnolddu su ca dax ca a mel arsae bei lei olnolddu;
medeil su ca ddei cabeix bei a mel arsae bei lei cixrkui.
- 21 Goxrsol-goxrnaxr mel zuixl bei su ca ddei dax ggaxrmae dae;
nixmox seir su ca ddei leil arsae bei lei seirseir bei koxl xixl.
- 22 Ca seir ddei yar giedae ca mel leil leixrmeir dol gger;
zuixl bei su ca ddei nixmox seir su leil zzirbae zaxr gger.
- 23 Sol su ca ddei mi paxr a loxlmoxr hanol se wo,
nael bbae-nr-hhex bei su mel su jjia si a.
- 24 Zzargger sser a ssor leil deil nrnixr a mel dder yar leil vuxryixr;
ssor leil perniar a mel arddolcar lei yar leil guaxr.
- 25 Nixmox seir su ca ddei zzorbbox ddu zza;
nixmox neix su ca dei nael xilbe meixr dae.
- 14** ¹ Olnolddu ssormaer ddei mel jiaddex hhexddex du lei;
medeil ssormaer ddei mel armael ake ddei bei xiaxr gger.
- ² Hoxrhoxr bei su ca ddei Yihexrhuaxr leil gexr a idu;
nr seir bei su ca ddei Yihexrhuaxr leil izei.
- ³ Medeil su ca ddei ddarvar te dae mel armael leil deil ddu te;

- olnol ddu su ca ddei meir gga bbeix teixl lei mel armael leil guaxr dae.
- ⁴ Mimor ddu niur nr zeil a mel latur ddei lei seibeix; loxlmoxr hanol se wo a mel niur naxrcixl nia.
- ⁵ Ddarzzi ddo ddar bbeixjjiu su ddei ddarjjar nr te; ddar bbeixjjiu su yarjjar ddei ddarzi nr te.
- ⁶ Col su ca ddei olnolddu ddei leil zo a zzael zo nr wo; jilixr su ca ddei zzael cirza-hanga mel yarzi saexl so.
- ⁷ Ni medeil su ca ddei dax vimirmir sael giex dae nia; yar meir gga ca leil azo mul gger ddu nr zza.
- ⁸ Ciza-hanga saexl su ca ddei olnolddu ddei leil koxl dae a jjiumo bbekae; medeil su ca ddei medeil ddei yar leil fur.
- ⁹ Medeil su ca ddei zuixl bei dae mel leil igax meixr; nixmox seir su ca mel nael zzicar-zzileil seirlol.
- ¹⁰ Nixmox zzar cix dae a mel armael lar saexl; nixmox zzar ggese a lei kebal ca mel leil bbe gger nr cexr.
- ¹¹ Nixmox neix su ca ddei xi mel arsaе bei lei dezei; nixmox seir su ca ddei zaxlpoxr mel arsaе bei lei velver a zza dae.
- ¹² Jjiumo cirmelmel a i dae a hoxr, nael maelele ci a ca leil si lol ggie ssi mal.
- ¹³ Vae dae a lei nixmox zzar zzasol dae mel leil mier lol nr cexr; ggese goxr ho a lei cixddu mel halae zza dae seir.
- ¹⁴ Jjiumo hoxrhoxr zex leil nr ssi su ca ddei armael nr seir liwo mibbe mel liwo; ca seir ddei seirseir bei a, arsaе bei lei yar leil seirseir bei koxlxixl.
- ¹⁵ Medeil su ca ddei ddar nga a dder ddarzzi; cirza-hanga saexl su ca ddei nael cirbbi-cirbbi lei fa dae.
- ¹⁶ Olnolddu su ca ddei fa dae a yarzi gexr ddo mel dax nr naer; medeil su ca ddei colzzae col, olzzae ol vaer.
- ¹⁷ Habbeix-nrbbeix dder seifu faex su ca ddei bei dae mel medeil; yarzi jiuxr xiar ji dae su ca ddei leil ca mel vuxryixr.

- 18 Medeil su ca ddei liwo mibbe ddei mel mideil ddei nga a;
cirza-hanga saexl su ca ddei sul saexl dae mel yar oldde leil
ddexr labox ddei nga a.
- 19 Ca nr seir ddei ca seir ddei meixsaerqir leil puxr gex dae;
nixmox neix su ca ddei nixmox seir su ca ddei alddur dax puxr
gex dae.
- 20 Sol su ca ddei yar dax goxr naer dae ca mel lei yar leil vuxryixr;
be su ca ddei nael gaxggor carbeix yarzi miur.
- 21 Goxrnaer dae ca mel leil izei su ca ddei zuixl zza;
sol su ca mel leil zoxlnixr su ca ddei Arbosobo yar leil seir lol.
- 22 Yarzi gexrddo xiar a mel jjiumo ssi nr cox arddollei bbeixleir?
Seirseir xiar a mel arsae bei lei yar leil idu yar leil perniar.
- 23 Sulkuddo a mel seirggiebbæer zza;
meir ddei lar bbeix dae a mel arsae bei lei sol.
- 24 Olnolddu su ca ddei zzirbae mel yar oldde leil ddexrlabox ddei
nga a;
medeil su ca ddei nael azo lei nr saexl mel leil kuar.
- 25 Ddar bbeixjjiu car a ddarzi te a mel ca leil olga jiuxl;
meir gga ddarjjar te a mel ca leil fur.
- 26 Yihexrhuaxr leil gexr a idu su ca ddei koxlggie ddei yarzi ver;
yar ddei ssormine mel lei goxrsol-goxrnaxr mel leil pahher ggie
zza.
- 27 Yihexrhuaxr leil gexr a idu a meldder olga vi ddux lei ggie nga
a;
ca leil si lol var bel ddei dax jiuxl teixl lei cexr.
- 28 Cassor-worssor cirke zza a mel zzirmar ddei dder middux;
cassor-worssor nganiul a mel zzirmar ddei dder zzirmar
bei-nr-cexr a.
- 29 Seifu faex nr so ca ddei jilixr;
xilziga su ca ddei medeil.
- 30 Nixmox zzar azo seifu lei nr zza a mel ggecir ddei leil seir;
nixmox a mel hhergga ddei leil xiaxr lol.
- 31 Azo lei nrzza su leil gguxci a mel yar leil coxl su seirpor ddei
leil bei vuxryixr;

sol su leil zoxlnixr a mel seirpor ddei leil idu.

³² Nixmox neix su ca ddei yarzi gexrddo bei a si a;
nixmox seir su ca ddei si lozzezze lei koxlggie zza.

³³ Olnolddu ddei jilixr su ca ddei nixmox zzar hher ji dae;
medeil su ca ddei nixmox zzar azo lei nr saexl.

³⁴ Bbaehhexhhex mo bei dae mel goxrjia ddei leil sexr du lei lol;
zuixl bei dae mel cassor-worssor leil seixlda lol.

³⁵ Olnolddu vaerværpor mel leil zzirmar ddei ggese;
cexr-nr-ddo wormusu mel zzirmar ddei leil seifu faex lol.

15 ¹ Ddar norlixlix a te a ddarkoxl a mel seifux faexnor lol;
ddar te a lelelmo te a mel seifu de du lei.

² Olnolddu su ca ddei lo ddei cirza-hanga saexl dae mel biar teixl
lei;

medeil su ca ddei meir gga medeil mel biar teixl lei.

³ Yihexrhuaxr ddei meixddur zze zzarvul-zzarmae lei mia dae;
ca seir ddei leil nei nixmox neix su ca ddei leil lei yar i dae.

⁴ Toltor a nga lol dae ddar a mel ca leil olga zza lol;
nr hoxr ddar mel ca leil nixmox no zildu lol.

⁵ Medeil ca ddei arbbor guaxr dae mel leil izei;
bota dae mel leil noni su ddei saelnei olnolddu.

⁶ Nixmox seir su ca ddei ake gga zzirbae nei zzaegu zzeilil-zzeilor
zza;

nixmox neix su ca ddei seirseir li wo a lei doxgoxleixr yar leil
ke.

⁷ Olnolddu su ca ddei meir gga cirza-hanga saexl dae mel biar;
medeil su ca ddei nixmox zzar mel eine nr nga.

⁸ Yihexrhuaxr nixmox neix su ca ddei zi dae mel leil vuxyixr;
nixmox seir su ca ddei yar dax ddar biar dae mel leil noni
ggese.

⁹ Nixmox neix su ca ddei jjiumo zex leil Yihexrhuaxr vuxyixr;
bbaehhexhhex mo bei su mel leil yar nolnger.

¹⁰ Jjiumo hoxrhoxr zex leil nr ssi su ddei leil larhorhor mo faxr
nia;

bota dae mel leil vuxryixr su ddei arsae bei lei si.

- 11 Yiji ddei nei ca leil si lol su ddei lei Yihexrhuaxr meixsaerqir
leil kerzi dae nr cexr,
middurbbor ca mel nixmox zzar xiar dae mel gielgiel eine.
- 12 Col su ca ddei bota dae mel leil nol-nr-nger;
yar lei olnolddu su ca ddei leil biex nr yuex.
- 13 Nixmoxzzar ggese a mel qiaxrmeix ddei leil i dae a lei vaer dae;
nixmox zzar cix a mel ca ddei leil ha qir-nr-mi lol.
- 14 Jilixr su ca ddei ciza-hanga saexl dax nia qiuxr;
medeil su ca ddei mel medeil ddei leil lar li.
- 15 Goxrsol su ca ddei nixixl mel cixddu lillil a nga;
xiarkaexi su ca ddei arddolcar lei ggese.
- 16 Zzirbae lalal a zza lei Yihexrhuaxr leil gexr a idu a mel,
bir zzirbae cirke zza a nixmox zzar zzasol leil seir.
- 17 Var lar zzor lei zzicar-zzileil perniar a mel,
bir zzorci-ddami zzor a zzicar-zzileil vuxryixr leil seir.
- 18 Seifu vaer su ca ddei zex ddu bei teixl lei;
ssertexr zza su ca ddei zexddu mel lei mier lol.
- 19 Cabbaeyo ddei jjiumo zex leil alcur bbeix alcur a nga;
nixmox seir su ca ddei jjiumo zex bbaelerler mo kuaxbarbar
mo.
- 20 Olnolddu ssor ddei arbbor leil ggese lol;
medeil su ca ddei ama leil izei.
- 21 Azo lei nr saexl su ca ddei medeil a ggese;
jilixr su ca ddei nael hoxrhoxr meldax zox dae a bei.
- 22 Hoba zzi-nr-bbe a mel xiar dae mel bei nr cexr;
zzibbe su miur a mel xiar dae mel dder bei cexr.
- 23 Meir gga hoxrhoxrmo ddarkoxl a mel armael zzir dae a lei
ggese;
ddar te a mabbabba a te a mel yarzi seir.
- 24 Olnolddu su ca ddei olga zza jjiumo zex leil hobei ho saexl dax
a, yar leil yiji gga de nr ji lol.
- 25 Yihexrhuaxr arsae bei lei col su ca ddei xi mel caexr xiaxr gger,
maermocir hherggie middei ddei nael velper a zza dae lol.
- 26 Yarzi gexr ddo xiar dae mel leil Yihexrhuaxr vuxryixr;

- seibeixbeix arla ddar mel leil nael yar nolnger.
- ²⁷ Zzirbae tuxr a mel armael ake ddei leil ke;
zzirbae ho dae mel leil vuxryixr a mel zzasoso a gol dae cexr.
- ²⁸ Nixmox seir su ca ddei xiar har ho a sael ddarkoxl;
nixmox neix su ca ddei meir ddei ngaxl du lei a qie yarzi
gexrddo ddar mel te.
- ²⁹ Yihexrhuaxr nixmox neix su ca ddei dax vimirmir mo giex dae;
nael nixmox seir su ca ddei yar dax ddar biar dae mel leil noni.
- ³⁰ vaesirsir a vae dae a mel ca leil nixmox zzar ggese lol;
ddar seirseir mel ca leil ggecir-ggemo lei sosar lol.
- ³¹ Olga zza lol a bota dae mel leil noni a mel,
zoxlzoxl a olnolddu su ca mel dax hher dax dae a.
- ³² Mulgger dae mel leil no-nr-ni a mel armael ddei olga ddei leil i
zei,
bota dae ddei leil noni a mel olnolddu.
- ³³ Yihexrhuaxr leil gexr a idu a mel ca leil olnolddu lol;
ca mel ni leil idu lol niazzir a mel col nr ddo.